

cal Student and Teacher" Greinar þessar eiga að vera mótmæli gegn skoðunum Dr. Eliots fyrirverandi forstöðumanns Harvard-háskólans um trúarbrögð framtíðarinnar.

Mótmæli þessi eru, eins og vænta má, á engum rökum byggð. og sumt sem sagt er, eins og t.d. það, að án evangelíks kristindóms mundum vér vera á líku stigi og Suðurhafseyja búar, er blátt áfram fjarstæður og heimska sem undraverð er að nokkur maður skuli geta fengið af sér að halda fram nú á dögum. Það er jafn heimskulegt að vilja þakka kristindóminum alla menningu vestrænu þjóðanna og að halda fram að öll hjátrú og hindurviti liðinna alda hafi verið beinar afleiðingar hans.

Dr. Eliot hefir spáð, að trúarbrögð framtíðarinnar muni verða frjáls og laus við trúarjátningar og guðfræðiskenningar. Hver getur efast um að svo verði? Hvað eru trúarjátningar og guðfræðiskenningar kristnu kyrkjunar nú á dögum annað en dauður bókstafur, sem fæstir kæra sig nokkuð um? Evangelískur kristindómur mun hverfa úr sögunni smám saman, vegna þess að aðal inntak hans er ekki lengur í samræmi við þekkingu og hugsunarhátt nútímans. Hverju sem afturhaldssömum og þröngsýnum mönnum þóknast að halda fram um hann, er reynslan nú þegar búin að sýna með óyggjandi vissu, að sannleiksgildi hans varir eins lengi—og ekki vitund lengur en þær andlegar kringumstæður og skilyrði, sem hann varð til undir.

En hitt er áreiðanlegt, að þó evangelískur kristindómur hverfi hætta menn ekki þar fyrir að trúa; það rísa upp ný trúarbrögð, sem verða í samræmi við vísindi og sannleik þann, sem menn þekkja. Þessi trúarbrögð eru nú orðin útbreiddari en alment er ætlað bæði á meðal þeirra sem hafa sagt skilið við rétttrúnað kyrknanna og einnig margra, sem ennþá álíta sig honum fylgjandi, án þess að vera það.

Dr. Eliot hefir alla æfi tilheyrt hinum eina sann-frjálslynda trúarflokki, sem til er innan kristnu kyrkjunnar, og enginn maður mun vera færari en hann að dæma um hvert stefnir í trúmálum. Þegar hann segir, að trú framtíðarinnar muni verða frjáls lífsskoðun hvers manns, byggð á kærleikanum til guðs og mannanna, þarf enginn að efast um að hann hefir réttara fyrir